

Fai 'e Jenna Koford

Makatu'unga 'i ha talanoa mo'oni

“[‘Oku 'i ai hoku fāmili 'i māmani.] [‘Oku nau angalelei kiate au]” (Tohi Hiva 'a e Fānaū, 98).

“‘Anitelū! Ko e pasī 'eni!” Ko e ui atu ia 'a Nena. Ne lele atu 'a 'Anitelū he matapā ki tu'ā. Na'e ta'ata'alo mai kia Nena, Papa, pea mo hono ki'i tuofefine, ko 'Eimī. Na'e kei si'i 'a 'Eimi ke 'alu ki he akó, ko ia ai na'e nofo pē 'i 'apī mo Nena mo Papā.

Ne sai'ia 'a 'Anitelū he akó. Na'á ne sai'ia 'i he va'inga mo hono ngaahi kaungāme'á 'i he taimi

mālōlō si'i. Na'á ne sai'ia 'i he'ene faiakó, 'a Misi Kimipolo.

Hili e mālōlō si'i he pongipongi, na'e pehē ange 'e Misi Kimipolo, “I he uike kaha'ú, 'e fakahoko ai ha 'Aho 'Omi-ha-Mātu'a-ki-he-Akó. 'I he taimi 'e omi ai ho'omou mātu'á, fakapapau'i 'oku nau 'omai ha me'a mei he'enu ngāué ke faka'ali'ali kiate kitautolu. 'Oku tau fiefia ke fanongo kiate kinautolu!”

Na'e 'ikai fakapapau'i 'e 'Anitelū 'a e 'Aho 'o e 'Omi-ha-Mātu'a-ki-he-Akó.



TA FAKATAA'E GUY FRANCIS

Na'e kula e mata 'o 'Anitelū. Na'e 'ikai ha me'a ia ke ne fakamatala 'o kau ki he'ene ongomātu'á. Na'e 'ikai ke ne manatu'i ha me'a lahi kau ki he'ene fa'eé. Na'e mavahe ia 'oku kei si'i. Pea na'e 'ikai ke 'ilo 'e 'Anitelū 'a 'ene tamaí.

Ne fanongo pē 'a 'Anitelū ki he talanoa e fānau kehé 'o kau ki he'enu ngaahi fa'eé mo e ngaahi tamaí. Ko e fa'ē 'a Toní ko ha tokotaha tāmatae afi, pea ko e tamaí 'a Sēsiká na'e ngāue 'i he suú (zoo). Ne faka'amu e tokotaha kotoa 'e 'omi 'e he'ene tamaí ha ngeli pe ko ha monumanu ki he kalasí!

“Fēfē ho'o ongomātu'á?” Ko e fehu'i ia 'a Toni kia 'Anitelū.

Na'e sio pē 'a 'Anitelū ki hono va'é. Fakamafuta hono ongo umá. “Oku ou nofo mo 'eku ongo kuí.”

Na'e 'ofa 'a 'Anitelū 'ia Nena mo Papā, ka na'e 'ikai ke 'i ai ha'ana ngāue fēfē. Ne fakatau atu 'e Nena ha ngaahi sipi kafu mo ha vala pēpē. Na'e faka'uli 'e Papā ha fu'u loli me'akai. Na'e 'ikai fakapapau'i 'e 'Anitelū 'a e 'Aho 'o e 'Omi-ha-Mātu'a-ki-he-Akó.

Ne lau 'e 'Anitelū 'i he pō ko iá 'a e vahe 'uluaki 'o e Tohi 'a Molomoná: “Ko au, Nifai, ko e me'a 'i he fanau'i au 'i he ongo mātu'a lelei . . .” (1 Nifai 1:1).

Na'e fakakaukau 'a 'Anitelū, “Oku 'ikai ke u nofo mo 'eku ongo mātu'á.” “Oku ou nofo pē mo Nena mo Papa.”

Fe'unga pē ia mo e hū mai 'a 'Eimi ki he loki 'o 'Anitelū, 'okú ne kukukuku ha sipi kafu. Na'á ne hiki hake ia ke sio ki ai 'a 'Anitelū. “Ngaohi 'e Nena!”

“Io, na'e ngaohi 'e Nena e sipi kafú ma'au.” Na'e ki'i malimali 'a 'Anitelū.

Na'e fakakaukau ki he ngaahi me'a lelei kotoa pē na'e fai 'e Nena ma'aná—ngaohi ha me'atokoni pongipongi kimu'a he akó, tokoni 'i he ngāue fakaako mei 'apí, va'inga mo ia pea mo 'Eimi. Ne hangē 'a Nena ha fa'eé.

Pea fakakaukau leva 'a 'Anitelū kia Papā. Na'e lau 'e Papā ha ngaahi talanoa kia 'Anitelū 'i he pō kotoa pē. Na'á ne tokoni 'i he ngāue fakaako mei 'apí. Na'á ne ako'i foki 'a 'Anitelū ke lava 'o heka 'i ha paiki. Ne hangē 'a Papā ko ha tamaí.

Na'e faka'au ke lalahi ange e malimali 'a 'Anitelū. Na'e hounga'ia mo'oni koe'uhí ko Nena mo Papā. Na'á ne kei ongo'i manavasí pē fekau'aki mo hono 'omi ha kui ki he akó. Ka 'e sai pē. Na'á ne fakakaukau, “Mahalo 'oku 'ikai ke u ma'u ha ongo mātu'a lelei, ka 'oku ou ma'u ha ongo kui lelei, pea ko ha me'a makehe ia.”

'I he 'Aho 'o e 'Omi-ha-Mātu'a-ki-he-Akó, na'e tangutu 'a 'Anitelū mo Papā 'i mui 'i he kalasí 'o fanongo ki he mātu'a 'a e fānau kehé. Na'e 'omi 'e he fa'ē 'a Toní hono teunga tāmatae afi. Na'á ne tuku ki he tokotaha kotoa ke nau tui 'ahí'ahi hono tataá. Ne 'omi 'e he tamaí 'a Sēsiká ha fonu mei he suú (zoo).

Na'e pehē 'e Misi Kimipolo, “Anitelū, ko ho taimí 'eni.” Ne lue atu 'a 'Anitelū ki mu'a he kalasí mo Papā. Na'á ne mihi'i 'ene mānavá pea pehē ange, “Oku faka'uli 'eku Papā 'i ha loli lahi 'o fetuku e me'akai. 'Okú ne fetaulaki mo ha kakai tokolahi, pea 'okú ne ngāue mālohi.”

Ne sio hake 'a 'Anitelū 'o vakai ki he malimali 'a Papaá. Pea toki talanoa leva 'a Papā fekau'aki mo e faka'uli he'ene lolí. Na'á ne toe tufa foki ha lole mei he'ene ngāué ki he tokotaha kotoa pē! Na'e fai 'e he fānau 'i he kalasi 'a 'Anitelū ha ngaahi fehu'i lahi kia Papā 'o kau ki he'ene ngāué.

Na'e fiefia 'a Anitelū ke 'i ai mo Papā. Na'e hoko ia mo Papā mo Nena mo 'Eimī ko ha fāmili—pea ne nau hoko ko ha fāmili lelei. ■

'Oku nofo e tokotaha na'á ne fai e talanoá 'i 'Iutā, USA